

每週經課朗誦經文（巴克禮台語漢字）2012/02/26

共同經課-1 創世記九章八節～十七節

8 上帝給挪亞及伊的子講：9 「我，我及恁以及恁的後裔立我的約。10 亦及許個及恁佇啲一切的活物——就是及恁佇啲的飛鳥、精牲一切走獸，見若對大船出來地上一切的走獸——立約。11 我及恁立我的約，見有肉體的，無闇互大水滅無，亦無闇有大水毀壞土地。」12 上帝講：「我及恁亦及許個及恁佇啲逐樣的活物所立永世代的約是有記號。13 我將我的虹下佇雲裡，通做我及地立約的記號。14 以後我互雲起遮地的時，欲有虹出現佇雲裡。15 我就記念我及恁以及逐樣有肉體的活物所立的約，水無闇氾濫損壞一切有肉體的物。16 虹欲出現佇雲裡，我欲看伊，互我記念上帝及地上逐樣有肉體的活物所立永遠的約。」17 上帝對挪亞講：「這就是我及地上一切有肉體的物所立的約的記號。」

共同經課-2 詩篇二十五篇一節～十節

1 〔大衛的詩〕耶和華啊，我的心神仰望你。2 我的上帝啊，我平素倚靠你；呣通互我見誚，呣通互我的對敵因為贏我來誇口。3 見若聽候你者的確無見誚；許個無緣故行奸詐者欲見誚。4 耶和華啊，求你將你的道路指示我，將你的路途教示我！5 求你導我佇你的真理，閣教示我，因為你是救我的上帝。我通日聽候你。6 耶和華啊，求你記念你的憐憫及你的慈愛，因為這是古早以來常常有的。7 求你呣通記念我少年的罪過及我的過失；耶和華啊，求你照你的慈愛，因為你的恩惠記念我，8 耶和華是好閣正直，所以伊欲指示罪人行正路。9 伊欲用公平引導謙遜的人，伊欲用伊的道路教示謙遜的人。10 見若守伊的約及伊的干證的人，耶和華款待 in 攏是用慈愛誠實。

共同經課-3 彼得前書三章十八節～二十二節

18 因為基督也一擺為著罪受苦，義的替不義的，是欲導咱到佇上帝。論肉體，就受死；論神，就得活。19 佇彼個神也會去傳道理互監內許個神，20 就是早呣信趁的，當上帝吞悞聽候佇挪亞的日、啲備辦大船的時。入彼內面的人少少，只有八個對水得救。21 此個所關照的洗禮，今也救恁；呣是除去肉體的垃塗，就是無通責備的良心向上帝來求，是對耶穌基督的復活。22 伊已經去天裡，今佇上帝大旁；諸個天使及有權柄的，有氣力的，降服伊。

共同經課-4 馬可福音一章九節～十五節

9 當諸個日，耶穌對加利利的拿撒勒來，佇約但河對約翰受洗禮。10 即時對水起來，就看見天裂開，聖神親像鴿仔，降臨佇伊的頂面。11 閣對天有聲，講：「你是我所疼的子，我歡喜你。」12 聖神即時迫伊去曠野。13 佇曠野四十日，抵著撒但試，也及野獸相及住，有天使伺候伊。14 約翰已經關監，耶穌到加利利，傳上帝的福音，15 講：「日期滿啦，上帝的國近啦。恁著反悔來信福音！」